

GK Krugersdorp: Kon begaafde vroue nie langer uit hou

Dr. Wim Vergeer, predikant,

Gereformeerde kerk Krugersdorp

Kerke se sake moet op 'n kerklike wyse hanteer word (en nie in die pers nie). Daarom reageer ek nie hier op die Wes-Rand-klassis se optrede teenoor ons (die Gereformeerde kerk Krugersdorp) nie.

Wanneer daar in die wêreld beweer word dat ons gemeente ongehoorsaam is aan God se Woord (Willem Swanepoel se briewe oor 1 Timoteus 2:12), kan ek nie daarvoor stilbly nie.

Ons gehoorsaam wel die Woord van God, en dit met toewyding.

Ons gehoorsaam wel nie bepaalde menslike interpretasies van die Woord van God wat teen goeie eksegeese en ons gewete indruis nie. Ons buig voor God - nie voor mense nie. 1 Tim. 2:12 (die verbod op leer en regeer) maak deel uit van minstens ses voorskrifte aan vroue in vers 9-11.

Hieronder val die verbod op gevlegte hare, goud en pêrels en die opdrag tot goeie werke. Al hierdie voorskrifte word met dieselfde gesag deur dieselfde persoon in dieselfde grammatikale konstruksies en in dieselfde perikoop aan dieselfde mense gerig.

Wanneer ons eerlik en met integriteit optree, kan dié voorskrifte in die eksegeese nie in isolasie van mekaar behandel word nie. Daar moet konsekwentheid wees - ook in die toepassing daarvan - sowel binne as buite die kerk.

Die dekade lange eensydige aksent op net een van die voorskrifte aan vroue en die selektiewe toepassing daarvan net op die ampte deur 'n sinode van slegs mans, terwyl die res van die voorskrifte geignoreer word, kan na ons mening nie gehandhaaf word nie.

Die Gereformeerde kerk Krugersdorp het meer as tien jaar lank daarvoor gestudeer en besware ingedien. In afwagting van antwoorde het ons in dié tyd nie vroue bevestig nie. Toe die sinode na al die tyd ons by herhaling nie oonuiigende antwoorde uit die Skrif kon gee nie en ons mede-standers se besware nie langer aangehoor is nie, kon ons in ons gewete voor God nie langer begaafde vroue uit die amp weer nie. Die Skrif verbied dit nêrens nie. Hulle is bevestig en die Heilige Gees seën hul werk met groot vrug. Ons respekteer die sinode en is eenstemmig met al sy ander besluite, maar kan dit in hierdie enkele geval nie doen nie.

Het 1 Tim. 2 dan nog gesag? Die vraag was vir ons nooit of dit gesag het nie, maar hoe dit gesag het. Die genoemde voorskrifte volg duidelik op (en is diensbaar aan) Paulus se uitspraak dat dit die wil van God is om alle mense te red (1 Tim. 2:3).

Paulus self sê elders hy is daar voor bereid om vir die Jode 'n Jood en vir almal alles te

word (kultureel aan te pas: 1 Kor. 9:20-23). Sy voorskrifte (1 Tim. 2:8-12) beskryf dus hoe gelowige mans en vroue in die Efese van ongeveer 62 nC. moet optree om geloofwaardige getuies van die evangelie te wees en mense te red.

Wie mooi nadink, sal insien dat gelowiges vandag ook maar aan sekere gedragsreëls in die samelewing voldoen ter wille van die verkondiging van die evangelie.

Om vroue met die nodige gawes nog langer uit die amp te weer, is na ons oortuiging nie deel daarvan nie.